



寧波歷史文獻叢書

# 宋元四明六志

【三】

寧波市地方志編纂委員會 整理

寧波出版社

四明志卷第十一

宋元四明六  
志弟二十三

朱

羅

濬

等

撰

郡志卷第十一

敘祠

聖人之制祭祀也法施於民則祀之以死勤事則  
祀之以勞定國則祀之能禦大災則祀之能捍大  
患則祀之後世俗或因其所畏慕釋老氏各奉其  
所祖祠宇繁矣推建置之義而反其忠信誠慤之  
心其可乎

神廟

靈應廟卽鮑郎祠也舊曰永泰王廟北距子城二里半  
按輿地志云鮑郎名蓋後漢鄮邑人爲縣吏縣嘗俾  
捧牒入京畱家酣飲踰月不行縣方詰責已而得報  
章果上達旣死葬三十年忽夢謂妻曰吾當更生盍  
開吾冢妻疑不信再夢如初乃發棺其尸儼然如生  
第無氣息耳冥器完潔若日用者棺之四旁燈然不  
滅膏亦不銷郡人聚觀咸怪神之爲立祠宇梁大通  
間奴賊名益誕倡誘羣盜有衆三千號奴抄兵寇會  
稽永嘉臨海海鹽並海郡邑咸被其害官軍累邀擊  
不勝賊勢益張定襄侯蕭祇爲刺史神忽見形因巫

語祇願助討賊祇乃設帷帳迎神置于譙門形雖隱  
而言與人接越三日去去語祇曰當以八月十三日  
破賊奴抄果以是日至餘姚舟膠于江衆陷于淖憤  
憤如醉官軍悉繫縛之若拾遺者祇奏其異武帝遣  
增大祠宇日以益盛唐聖厯二年縣令柳惠古徙祠  
于縣會昌中刺史張次宗記其事皇朝崇寧二年尙  
書豐稷奏明州鮑君永泰王廟額犯哲宗皇帝陵名  
乞改爲靈應勅如請政和八年守樓异以雨暘時若  
有禱輒應奏請王爵加惠濟王宣和四年守李友聞  
因睦寇竊發驚擾鄰邑境內安全繫王之功奏請加

封于是加威烈二字六年侍郎路允迪使高麗蹈海  
無虞奏請再加忠嘉二字建炎四年車駕巡幸勅加  
廣靈二字今稱忠嘉威烈惠濟廣靈王

純德廟東漢孝子董君祠也西北距子城五十五步唐  
大厯十二年立刺史崔殷記徐浩書君名黯其孝行  
已見敍人今祠宇卽其故宅先是其母塑像在南郭  
外草堂中康憲錢公億因訪問而知之乃迎歸孝子  
廟且具其事請于朝勅賜純德徵君之廟徐浩所書  
碑石不存今碑簽判韓嘉所重刻也

五龍堂唐刺史李伉以天壽院天井歲旱禱雨必應有

金線蜥蜴出而赴感乃卽開元宮建五龍堂俾郡人咸便香火且爲記以著靈異其略曰在天莫如龍龍之德佐天地養萬物百穀賴以生四海所共尊者也社祭土稷祈穀國之重典也旣立壇以享其神矣則龍之靈翔風洒雨澤枯槁滋稼穡可不嚴奠酌之哉余受命牧明人四月戾止六月大旱俾吏具香酒敬祈于五龍之神有蜥蜴狀者躍入盃中飲酒復出緣器上顧吏久之跳躑而去吏未返雨已大注由是生植茂遂闔邑豐衍思所以崇祀事答神休者乃建宇爽塏依方塑像以時薦享謂之五龍祠堂云時咸

通六年季秋之末也皇朝乾道四年守張津以舊宇  
庫隘乃移創于報恩光孝觀之申地卽開元宮也

飲飛廟子城北一里二百步鹽倉之西昔有碑今亡故  
神之姓氏邑里無傳焉淮南子云荆有飲非得寶劍  
于干遂還反渡江中流暴風揚波兩翼夾繞其舟飲  
非謂柅船者曰嘗有如此者而得活乎曰未嘗見也  
于是飲非瞋目勃然攘臂拔劍曰武士可以仁義說  
也不可劫而奪之此江中之腐肉朽骨棄劍而已余  
又奚愛焉赴江刺蛟遂斷其頭舟中人盡活荆爵爲  
執圭孔子聞之曰夫善戰腐肉朽骨棄劍者飲非之

謂乎按皇朝建隆中鄆令金翊纂異記謂唐武德時  
以此郡爲鄆州至開元中改鄆爲明郡名奉化城號  
甬東地名句章軍號飲飛攷此則飲飛廟者蓋出於  
當時之軍號而軍必有以將之者往往有功于人故  
人爲之祠云大觀之初本州所編九域志乃引淮南  
子所謂荆有飲飛不知淮南子之非實非是之非非  
飛走之飛今廟新榜遂稱荆飲飛侯豈非好事者附  
會其說而增以荆字歟

舊志所辨飲非之說如此今存之然軍號飲飛未  
必不取義于荆飲非之勇古字轉用甚多何必于  
非飛二字疑之或云旁有蛟池蛟自江來窟于此  
人患之故鎮以廟池今爲民居所侵堙塞無幾又

或云唐末刺史黃晟初以飲飛都副兵馬使防遏寇盜保護鄉井沒而人祠之不曰刺史而曰飲飛蓋自領兵時人倚爲重故習稱其舊號云

大人堂子城內府治北射圃中俗呼神曰闕相公事之甚謹大讀如馱大人者尊稱之詞也然莫知本始吳越王時有近臣曰闕燾謫守于此初甚怏怏既至則悅謂居內不如守郡之樂未幾誅死未知所祀卽其神否又有闕澤三國時爲吳太子太傅今慈溪普濟寺乃其故宅鄞與慈溪接土人祀之亦未可知高閑撰記直指爲節度使錢億特意之爾至循舊經之說謂郡治鄞縣寶應後乃移治鄞尤爲無據

東嶽行宮在報恩光孝觀東皇朝紹興十年仇愈建知  
觀事宗元大師袁志賢募緣所成也有聖母池人或  
竊同居之物諱而不承則相與詣聖母前焚香已各  
投楮鏹于池浮者心負以此人敬畏之

張帝廟舊附靈濟院佛殿之右隘陋卑溼淳祐六年夏  
制帥集撰顏公頤仲卜院之南偏鼎新建勑

按曰此條後守

續增

白龍廟延慶寺之東嘉定十三年火十五年見象于其  
地人異之廟復立

### 宮觀

煙嶼樓校本

大慶觀子城東南一里唐天寶二年詔天下皆置紫極宮以祠老子梁開平二年易爲眞聖觀皇朝大中祥符二年詔賜今名且命立聖祖殿扁以金字牌天禧二年守臣劉綽奏自今請令郡官到任得替泊朔望並齊潔朝拜奏辭從之當時有旨住觀滿三年無曠失聽度係帳道童一人大觀元年二月十八日御寶批改歲度道士一名政和四年正月二十一日仍被旨每年特賜紫袍一道紹定元年正月居民失火延燎及觀守臣胡榘重建聖祖殿改扁金字牌又翼以雙廡護以屏牆朝拜如初櫺星門亦復其舊

報恩光孝觀子城東南八十步本唐開元二十六年所  
置開元宮也後嘗改爲崇壽宮皇朝崇寧二年有旨  
改崇寧萬壽政和元年改天寧萬壽紹興十三年二  
月改今額

寺院

禪院三

萬壽院子城東南一里在唐爲慧燈院咸通十三年史  
君周景遇捨廨宇以建仍捨田以充常住聞諸朝而  
賜額皇朝開寶八年重建太平興國七年改崇壽政  
和八年四月改廣慧專充啓建祝聖道場建炎四年

火于兵重建嘉定十三年再火又重建或謂慧字從  
彗從心于星皆火讖也爲寺額不利郡爲聞于朝紹  
定元年正月十三日有旨賜今額是日東北廂火環  
寺皆延燎而寺獨存人咸異之本寺常住田一千四  
百五畝山一百一十畝

報恩光孝寺子城西百步在唐爲國寧寺大中五年置  
皇朝崇寧二年詔改崇寧萬壽禪寺遇天寧節賜紫  
衣度牒各一道政和元年八月七日勅改天寧萬壽  
紹興七年改報恩廣孝禪寺是年又改今額專一充  
追崇徽宗皇帝道場有鐵塔建隆間康憲錢公億所

建又有深沙神初自奉化之岳林寺編舟載至太平興國寺繼徙本寺之西廊蓋工人黃百藝極雕刻之巧而爲之者常見光明雀鼠俱莫敢近建炎間寺燬於兵而深沙神之屋巋然獨存瞻奉者愈加敬也常住田二千一百五十九畝山二百六十畝

吉祥院鄞縣東南一百步晉天福五年建六年以釋天院爲名皇朝太平興國八年改賜今額嘉定十三年火重建常住見置

#### 教院四

延慶寺子城南三里周廣順三年建日報恩院皇朝至

道中僧知禮行學俱高眞宗皇帝遣使加禮大中祥符三年改院名延慶天禧元年賜禮紫衣尋又賜法智大師內翰楊億及都尉李遵勗稱論之力也太守李夷庚尤推重之禮嘗結十僧爲懺悔佛事約三年共焚身以諸公言止住持四十餘年乃逝曾會守郡時禮夜夢神諭之曰翌日丞相來已而會之子公亮至禮以告洎公亮大拜請于朝置田闢舍大啓法席僧圖其像祠焉元豐中禮曾孫中立世其教比邱介然來依道場修淨土之法募緣結屋六十餘間中建寶閣立丈六彌陀之身夾以觀音勢至環爲十有六

室室各兩閒外列三聖之像內爲禪觀之所初然手  
一指誓以必成元符三年落成尋又然三指以增淨  
誓忠肅陳公瓘記之紹興十四年有旨賜教額寺之  
大悲閣有辟支佛舌舍利并普賢菩薩像皆禮所立  
嘉定十三年僧以像小欲修之剖其臙書云動此者  
水火爲災未幾寺火像滅今丞相魯國公重建常住  
田二千二百一十畝山無

寶雲院子城西南二里舊號傳教院皇朝開寶元年建  
太平興國七年改賜今額先是有僧義通自三韓來  
振譽中國漕使顧承徽舍宅爲義通傳道所乞額寶